

## NAŠ TREĆI BROJ

Treći broj *Historijske misli*, obzirom na karakter i raznolikost priloga te porijeklo njihovih autora, potvrđuje opravdanost pokretanja časopisa i njegovu relevantnost u naučnom i društveno-intelektualnom prostoru Bosne i Hercegovine i regiona. Ovo je tim važnije istaći ako se uzmu u obzir današnje stanje historiografije u Bosni i Hercegovini, naročito izraženi trend marginalizacije i trivijalizacije historijske nauke u bosanskohercegovačkom društvu, ali i postojeći, još uvijek relativno oskudni kadrovski i institucionalni kapaciteti za ozbiljno i sistemsko bavljenje historijom na području Tuzlanskog kantona. Fragmentarno usmjeravanje društvene pažnje na historijska pitanja tek prilikom praznika i jubileja, potiskivanje nastave historije iz nastavnih programa osnovnih i srednjih škola, rijetki talenti kojim društvo i država ne omogućavaju da svoje znanje i afinitet prema historiji pretoče u profesionalni poziv, u trajno i plodotvorno zanimanje – činjenice su koje govore same za sebe i kojim ne treba dodatno pojašnjenje.

U trećem broju donosimo jedan broj radova sa Naučnog skupa "Odnosi Bosne i Hercegovine sa susjedima kroz historiju". Skup je održan 18. i 19. novembra 2015. godine na Filozofskom fakultetu Univerziteta u Tuzli, a organizirali su ga Društvo historičara Tuzlanskog kantona i Odsjek za historiju Filozofskog fakulteta Univerziteta u Tuzli. Namjera organizatora je bila – u sadašnjici koja svjedoči o neprekinutim turbulencijama u odnosima između Bosne i Hercegovine i susjednih država – da se baci dodatno svjetlo na položaj Bosne i Hercegovine u kontekstu geopolitike Balkana te međunarodnih i regionalnih odnosa u različitim historijskim razdobljima, ali i da se omogući da se pojedini historijski događaji sagledaju i dobiju smisao u okvirima širih historijskih procesa, od kojih neki traju i dan danas, opterećujući živote ljudi na jugoistoku Evrope, u ionako nestabilnom i izazovima bremenitom svijetu XXI

stoljeća. Nažalost, premda je na skupu ponuđeno nekoliko kvalitetnih i zapaženih izlaganja, ponovo su samo pojedini prilozi pretočeni u radove i prosljeđeni Redakciji na objavljivanje. No, vjerujemo da će i ovaj ograničen broj radova sa skupa moći poslužiti historičarima i drugim stručnjacima u njihovom istraživačkom pristupu važnim temama kako starije, tako i novije prošlosti Bosne i Hercegovine i njenog susjedstva.

Stjecajem okolnosti fokus ovog broja, u neku ruku, stavljen je na Drugi svjetski rat, što smatramo korisnim i pozitivnim, ako se ima u vidu da teme iz Drugog svjetskog rata kada je Bosna i Hercegovina u pitanju već duže vrijeme ostaju izvan okvira osmišljenih istraživačkih napora profesionalne historiografije. Ti napori kontinuirano dobivaju na značaju ima li se u vidu razina neznanja i političko-ideoloških manipulacija različitih usmjerenja koje prate doticaje sa temama iz Drugog svjetskog rata u savremenim postjugoslavenskim društvima.

Još jednom se želimo zahvaliti svim kolegama, prijateljima, donatorima i saradnicima koji su učestvovali i omogućili izlazak dosadašnjih brojeva *Historijske misli*, uz poziv historičarima i naučnicima i stručnjacima srodnih nauka te zainteresiranim čitaocima na saradnju i učešće u izdavanju narednih brojeva našeg časopisa.

**GLAVNI I ODGOVORNI UREDNIK**